

Si₂ carta a₂ca₂jmo₃

SANTIAGO

Jmo₅ Santiago si₂ a₂chein₃ ne₄ dsa₂ 'én₂ i₂tián'₅ tsi₁rë₂jan₅₄ uíng₂

1 ¹ Jniá₂ Santiago, líng₅ i₂jme₂ti₃ ne₄ Diú₄ quian'₅₄ ne₄ Te₁gui'₅₄
Jesucristo, cuíng₅ Diú₄ ta₁guia₃-tíñ₂ nió'₃ tsi₁jon₂ dsa₂ juíg₂ Israel
i₂tián'₅ tsi₁rë₂jan₅₄ ta₁caun₂ mi₂güíg₃.

Jui₁lia'₂ jme₁jau'₂ 'í₁ a₂dsi₂ñí₂ dsa₂ 'én₂ 'e₂ niog₅ dsi₂ñíi₂

² 'Nia'₂ rin'₅₄ jniog₄, jmo₄ 'nia'₂ 'au'₂ a₂dseng'₃ gué₄ lin₃, jme₁dsi₂ñí'₂
'nia'₂ ca₂le₃jé₃ ne₅₄ táu₂ a₂jau'₂ 'í₁ ja₁con'₂ 'nia'₂. ³ Ia₁ ma₂ñi'₅₄ bá₄ 'nia'₂
jé₁ma₂ca₂jáu'₃ 'í₁ 'a₂ lia'₂ 'én'₂ 'nia'₂, dsiog₄ lia'₂ ma₂tión'₂ jaun₂ bá₄
'nia'₂ tiá₂. ⁴ La₁ cuín₅₄ 'nia'₂ jmig₄ a₂le₃'ñia₅ a₂në₅ ja₁cong'₂, tió'₃ 'au'₂
'nia'₂ jmo₄, jaun₂ dsi₁nóg'₅ léng'₂ dsa₂ i₂ma₂ca₂can'₅₄, i₂ma₂rë₂'ñia₅ lia'₂
ñí'₂ dsi₄, tsá₃ ma₃'e₂ 'nió'₅ quián'₂ 'nia'₂.

⁵ Chi₂jua'₂ chan'₂ 'nia'₂ i₂'nió'₅ le₃ñí'₂ dsí₅, jui₁mi₁₂ ja₁con₂ Diú₄, jaun₂
'éi₂ bá₄ cuë₃. Ia₁ Diú₄ i₂'ua₁ dsí₅ jmo₂₃ qui₂rë₂tin₂ ca₂le₃jín₃, on₃jua'₅₄
a₂të₂jí₂. ⁶ La₁ ca₂tín'₂ 'nia'₂ a₂mí'₁ a₂'éng'₂ të₃dsón'₂ on₃jua'₅₄ a₂'ág'₁ 'nia'₂
caun₂-tin₃ 'au'₂; ia₁ jui₁lia'₂ dsa₂ i₂'ag₅ caun₂-tin₃ dsí₅, líin₅ jui₁lia'₂ lë₅
jmig₂ a₂qui₂ráun₂ ne₄ jmi₁ñí'₄, a₂qui₂jná'₅ can₂ dsi₂ ca₂taun₂ ca₂taun₂.

⁷ Dsa₂ i₂lín₅ le₂jaun₂, tsá₃ jui₁dsi₂jiog₅ dsí₅ jua'₅₄ cha₂ a₂gue₃ quió'₅
Te₁gui'₅₄. ⁸ Ia₁ jui₁lia'₂ dsa₂ i₂'ei₅ tin₃ dsí₅ tsá₃ 'e₂ tiá₂ chén'₅ i₂le₂'éi₂
ca₂le₃jé₃ gué₄ 'e₂ a₂jmo₂₃, o₃ 'e₂ jág₁ quió'₅ cuë₂₃. ⁹ Dsa₂ rin'₅₄ jniog₄
i₂te₂ñé₂, ca₂tín₂ jmo₃ dsí₅ 'io'₂ jén'₅, ia₁ të₃dsón'₂ bá₄ quein₅ le₃ja₁con₂
Diú₄. ¹⁰ Jui₁lia'₂ i₂cha₂ cu₄ gué'₂, ca₂tín₂ bá₄ jmo₃ 'io'₂ ján₃ ia₁ tsá₃ 'e₂
quein₅ ja₁con₂ Diú₄ quian'₅₄ cú₁. Ia₁ i₂lín₅ jui₁lia'₂ lë₅ lí₁ ni₁nau₂ bá₄ dsa₂
i₂cha₂ cu₄ ia₁ i₂dsi₃ñí₂ bá₄ 'éi₂ jui₁la₂ 'iog₃. ¹¹ Jé₁ma₂ca₂'ia₂^a 'iog₂ dséi₅
'ñio₅ líñ₃ rë₂juíng₅ bá₄ ni₁nau₂, rë₂quein₂, ta'₂ bá₄ lí₁ ján₃, 'én₂ bá₄ 'a₂
lia'₂ jlá'₁ jme₁jniá₂. Le₂në₅ bá₄ lë₅ quian'₅₄ dsa₂ cha₂ cu₄: qui₂dsi₃ñí₂ bá₄
të₃ ja₁ 'no₂₃ cu₄.

On₃jua'₅₄ Diú₄ i₂jmo₅ a₂co₂dsi₂'én'₅ dsa₂

¹² 'E₂ gué₄ dsen₃ dsa₂ i₂tió'₅ jmo₅ juin'₂ dsí₅ jé₁ma₂qui₂ñí₂ 'e₂ táu₂
i₂ñíi₂; ia₁ jé₁ma₂ca₂ñíi₅ jaun₂, gue₃ ja₁le₃chain₂ dse₃, a₂lé₅ në₂jag₄ bá₄
caun₂ corona a₂cuë₃ Diú₄ cué'₃ ca₂le₃jín₃ i₂'nio₃ quió'₅. ¹³ Chi₂jua'₂ chan₂
i₂lin₅₄ qui₂ja₂ bí₂ 'lig'₅₄ dsí₅, tsá₃ jui₁dsi₂jiog₅ dsí₅ jua'₅₄ Diú₄ i₂jmo₅
a₂dsi₂jiog₅ dsí₅ le₂jaun₂; ia₁ 'i₁caun₂ a₂'lig'₅₄ tsá₃ qui'₅₄ jmig₄ jua'₅₄
a₂cáin₂ táu₂ Diú₄, on₃ gué'₂ cáun₂ Diú₄ táu₂ quió'₅ 'i₁jan₂ ia₁jaun₂ jmo₃

^a11 Co₂'ñio'₄ le₃jua'₅₄, caun₂ cosa a₂tsá₃ 'i₄ jme₂dsí₂, a₂ca₂jmo₃ Diú₄. 'Nio'₂ ja₁ton₅ Salmo
8:3; Romanos 1:25.

dsa₂ a₂'lig'₅₄. ¹⁴ Le₂la₂ bá₄ lé₅: guion₅₄ bá₄ dsa₂ tsi₂cuiin'₂ jui₅ ja₁'ín₅ dsí₅ jmo₃ a₂'lig'₅₄, ja₁tiáiin'₃ dso₄, líin₅ në₂jag₄ bá₄ jui₁lia'₂ jan₂ i₁ju₁ i₂nág'₅ mi₂cu₄. ¹⁵ Ne₄ ja₁'ín₅ dsí₅ jmo₃ a₂'lig'₅₄ në₃, të₂le₃ ne₄ ja₁ñó₄ jaun₂ rë₂jniá₂ dso₄ bá₄ ja₁coin₂; jë₁ma₂ca₂'ñia₅ dso₄ në₃, rë₃cha₂ 'mú₃.

¹⁶ 'Nia'₂ rin'₅₄ jniog₄ i₂'nióg₃, tsá₃ jui₁le₂gan'₂ 'nia'₂, ¹⁷ ia₁ ca₂le₃jé₃ a₂lé₅ a₂dse₃ lin₃ a₂guei₂ jniog₄ já₅ guei'₅₄ quió'₅ Diú₄ Jmei₂ jniog₄ i₂ca₂jmo₃ ca₂le₃jé₃ si₂ cha₂ guei'₅₄ dsi₂güig₂. La₁ ja₁con₂ Diú₄ 'i₁caun₂ tsá₃ 'e₂ jua'₅₄ a₂qui₂rë₂tsín₃, jui₁la₂ qui₂rë₂tsín₃ si₂ le₁'ág₄ guei'₅₄, 'ag₅ 'en'₂. ¹⁸ Lia'₂ ma₂lé₅ jaun₂ bá₄ con'₂ lé₅ ma₂ca₂rë₃'ñió₃ dsí₅ 'ñiog₅, ma₂ca₂jmo₃ a₂ma₂ca₂rë₃chóng₃ jniog₄ të₂le₃ quian'₅₄ jág₁ dse₃ a₂tí₅ quió'₅, ia₁jaun₂ léi₂ jniog₄ i₂le₂'uig₅₄ jui₁lia'₂ caun₂ a₂ca₂rau₂ ca₂le₃jé₃ a₂ma₂jmo₃ 'éi₂.

Jui₁lia'₂ jé₁'én₂ dsón'₂ dsa₂ co₂dsau₅

¹⁹ Jui₁le₂ñjí'₅₄ 'nia'₂ a₂la₂, rin'₅₄ jniog₄: le₂jan'₂ le₂jan'₂ 'nia'₂ rë₂jáng'₁ a₂jñia'₅₄ nág'₁ de'₂, tsá₃ 'nió'₅ jua'₅₄ a₂ma₂të₂chan'₅₄ 'nia'₂ jág₁ a₂ñag'₅₄ dsi₂jui₅, on₃ guë'₂ 'nió'₅ tin'₃ 'nia'₂ dséng'₂ në₃ cóñ'₅. ²⁰ Ia₁ jui₁lia'₂ quian'₅₄ a₂dsén₂ dsa₂ tsá₃ lé₂ le₃jmo₃ a₂'ñjo₂ dsí₅ Diú₄. ²¹ Jaun₂ lë₃, tí₃ 'nia'₂ ca₂le₃jé₃ a₂'lig'₅₄ a₂lé₅ dso₄ a₂ñí₄ 'ñjo₅ cha₂ jmig₄ në₃, jmo₄ 'nia'₂ meg'₂ guen₅₄ co₂nei'₅₄ jág₁ dse₃ a₂ma₂jnia₄ të₂'au'₂ 'nia'₂; ia₁ jág₁ dse₃ në₅ bá₄ a₂'io₅ jui₅bí₂ a₂lió₂ jme₂dsí₂ quián'₂ 'nia'₂.

²² La₁ jui₁le₂chan'₂ 'nia'₂ lia'₂ con'₂ lë₅ jág₁, on₃hua'₅₄ rë'₂ a₂jñia'₅₄ 'nió'₅ nág'₁ 'nia'₂. Ia₁ në₁hua'₂ tsá₃ jme₂tí'₁ 'nia'₂, guion'₅₄ bá₄ 'nia'₂ jme₂gáng'₁.

²³ Ia₁ jui₁lia'₂ dsa₂ i₂jñia'₅₄ të₅ dsí₅ nag₂₃, tsá₃ jmo₂₃ guë'₂ a₂nag₂₃, líin₅ lia'₂ líin₅ jan₂ dsa₂ i₂jín₂ 'ñiog₅ ne₄ ni₁'í₂; ²⁴ la₁ jé₁ma₂ñó₅ cau₅ në₃, dsi₂'én₂ bá₄ táng₃ dsí₅ 'a₂ lia'₂ jniái₂. ²⁵ La₁ 'e₂ guë₄ dsen₃ dsa₂ i₂tsá₃ dsi₂'én₂ dsí₅ 'e₂ nag₂₃ të₂le₃ 'ñjo₅ líin₃ gué₄ tón'₂ jui₅ rë₂ jág₅ 'éi'₃ dse₃ a₂lión₂ dsa₂. Ia₁ jme₃gu'₅₄ bá₄ Diú₄ chi₂jua'₂ jmo₅ dsa₂ 'e₂ ta₁ quí'₅ 'éi'₃ jaun₂, caun₂ nau₂ tiá₂ bá₄.

²⁶ Chi₂jua'₂ chan₂ i₂lin₅₄ líin₂ 'ñjo₅ líin₃ jme₂ti₃ ne₄ Diú₄, la₁ në₁hua'₂ tsá₃ con₂ guë'₂ dsí₅ 'a₂ lia'₂ dsia₂₃ jág₁ në₃, ján₃ bá₄ guion₅₄ i₂le₂'éi₂ jme₂gain₂₃, ia₁ a₂'éin₂ jaun₂ tsá₃ 'e₂ ta₁ tí₄. ²⁷ Jui₁lia'₂ dsa₂ i₂'én₂ të₃dsón'₂ lia'₂ dsi₂ten₅₄ 'nio₃ Diú₄ Jmei₂ jniog₄, le₂la₂ bá₄ jmo₂₃: a₂jme₂'oin₅₄ chi'₂ 'nág₂ quian'₅₄ 'io₅₄ 'nág₂ në₃, 'e₂ caun₂ o₂i₁ dsi₅ chan₂ 'éi₂, ton'₂ jmo₂₃ 'í₁ a₂tsá₃ jme₃'ñioi₂₃ quian'₅₄ a₂'lig'₅₄ cha₂ mi₂güíg₃.

2 ¹Rin'₅₄ jniog₄, i₂'én₂ le₃quió'₅ Te₁gui'₅₄ Jesucristo i₂jlán'₁ quián₂ jniog₄, tsá₃ ca₂tín'₂ 'nia'₂ jing'₅₄ jma₃quén₅ i₂la₂ i₂ó₃. ²Jui₁lia'₂ të₃jé₄ tion'₅₄ 'nia'₂ le₁ñig'₂, dsiog₄ jan₂ dsa₂ cha₂ cu₄ i₂'í₄ anillo cu₄niog₄ gu₂, i₂chén'₅ jlá'₁, la₁ në₁hua'₂ ján₃ guë'₂ të₃jé₄ jaun₂ dsiog₄ jan₂ dsa₂ te₂ñé₂ i₂chén'₅ 'lig'₅₄, ³në₁hua'₂ ca₂guen'₅₄ 'nia'₂ rë₂ lin₃ i₂qui'₂ tsin'₅₄ jlá'₁, në₁hua'₂ ca₂chei'₅₄ 'nia': "Nia₅ i₂né₂ ja₁dse₃ la₂", la₁ i₂te₂ñé₂ guë'₂ në₃ juig'₅₄ 'nia': "Ne₂ jó₄ nau₂", o₃ "ja₁lá₃ i₂né₂ 'uë₃ cau₅ ja₁tióng₂ tag₃"; ⁴në₁hua'₂ le₂në₅ jmo'₂ 'nia'₂, ma₂jing'₅₄ jma₃quén₅ ríng'₂, ma₂qui₂cáun'₂ 'nia'₂ 'í₁, a₂ma₂dsí₂jiog₅ 'lig'₅₄ 'au': ⁵'Nia'₂ rin'₅₄ jniog₄, nei₂ 'nia'₂ a₂la₂:

Diú₄ ma₂ca₂quióin'₂ i₂lín₅ i₂te₂né₂ mi₂güíg₃ la₂, ia₁jaun₂ léin₂ dsa₂ jlán'₁ quian'₅₄ a₂'éin₂, ia₁ tiin₃ ja₁gon₂ Diú₄ ja₁ma₂lé₅ jág₁ cué'₃ ca₂le₃jín₃ i₂nio₃ quió'₅. ⁶ La₁ 'nia'₂ néd₃ tē₂le₃ o₂guí'₃ bá₄ tsíng'₂ dsa₂ te₂né₂. ¿Ia₁ on₁jua'₅₄ dsa₂ cha₂ cu₄ gué'₂ i₂jmog'₂ 'ang₂ quián'₂ 'nia'₂, qui₂tsiin'₂ 'nia'₂ dsí₂chei'₂ ne₄ dsí₂tan₅₄ néd₃? ⁷ ¿On₁jua'₅₄ dsa₂ le₂'éi₂ gué'₂ i₂táun₂ 'lig'₅₄ jmá'₅ 'iin₂₃ i₂chen₂ jlán'₁, i₂le₃quió'₅ ja₁tén'₄ 'nia'₂?

⁸ Né₁jua'₂ dsí₂jó'₃ jme₂tí'₁ 'nia'₂ 'éi'₃ dsen₅₄ lia'₂ con'₂ léd₅ juá'₂ ne₄ Si₂: "Jme₁'nió'₄ dsa₂ mi₂güíg₃ ríng'₂ jui₁lia'₂ 'nióg'₃ 'ñiag'₂",^b dse₃ bá₄ néd₁jua'₂ jmo'₂ 'nia'₂ le₂jaun₂. ⁹ La₁ néd₁jua'₂ jin'₄ 'nia'₂ jma₃quén₅ i₂la₂ i₂ó₃, 'nau'₂ 'nia'₂ dso₄, ia₁ ma₂té₁dsí₅₄ 'Éi'₃ ja₁con'₂ 'nia'₂ guiong'₅₄; ma₂té₁tsin'₅₄ 'nia'₂ ma₂le₁cáng'₄ bá₄. ¹⁰ Ia₁ jui₁lia'₂ dsa₂ i₂jme₂ti₃ ca₂le₃jé₃ 'Éi'₃, la₁ néd₁jua'₂ ca₂'liain'₂ caun₂ 'éi'₃ tio'₅₄ néd₃, ja₁jaun₂ ca₂rë₃cáin'₂ ca₂le₃jé₃ bá₄ 'éi'₃ a₂tio'₅₄ ne₄ Si₂ jaun₂. ¹¹ Ia₁ Diú₄ 'éi₂ bá₄ i₂ca₂juá'₂ jme₁ca₂juá'₂: "Tsá₃ nió'₄ 'nia'₂ jág₁ quian'₅₄ dsa₂ i₂tsá₃ lín₅ dsí₂i₂gog'₂",^c ján₃ bá₄ i₂'éi₂ ca₂juá'₂: "Tsá₃ jñig'₄ dsa₂ mi₂güíg₃ ríng'₂".^d Jaun₂ le₂néd₅ chi₂jua'₂ tsá₃ ca₂táng'₂ gué'₂ dso₄ quian'₅₄ i₂tsá₃ lín₅ dsí₂i₂gog'₂, la₁ néd₁jua'₂ ca₂jñig'₃ gué'₂ dsa₂ mi₂güíg₃ ríng'₂ néd₃, ja₁jaun₂ ca₂rë₃cáng'₂ bá₄ ta₁jé₂ 'Éi'₃. ¹² Ca₂tín'₂ 'nia'₂ jmó'₂ ton'₂ dsíá'₁ jui₁lia'₂ dsa₂ i₂néd₃ gué₄ tē₃dsí₅₄ 'éi'₃ quió'₅ con'₂ léd₅ 'éi'₃ a₂lió₂. ¹³ Ia₁ jui₁lia'₂ dsa₂ i₂tsá₃ ca₂dsia₃ ñéi₂ dsí₅ rin'₅₄, ján₃ bá₄ le₂jaun₂ tsá₃ ñéi₂ dsí₅ Diú₄ dsia₃ ja₁con₂ 'éi₂ jé₁ma₂té₂ rë₁té₃dsí₅₄ 'éi'₃ quió'₅; la₁ jui₁lia'₂ i₂ca₂dsia₃ ñéi₂ dsí₅ rin'₅₄, a₂ñéi₂ dsí₅ jaun₂ bá₄ lí₂ jé₁ma₂té₂ rë₁té₃dsí₅₄ 'éi'₃ quió'₅.

'Nió'₅ le₃jníá₂ a₂'én₂ dsa₂

¹⁴ 'Nia'₂ rín'₅₄ jniog₄, ¿'e₂ bá₄ ta₁ jmo₃ néd₁jua'₂ chan₂ i₂juá'₂ ma₂'éin₂, néd₁jua'₂ tsá₃ gué'₂ 'e₂ a₂'ua₁ dsí₅ jmo₂₃? ¿Lé₂ le₃jua'₅₄ jniog₄ a₂tín'₄ dsa₂ le₂'éi₂ quian'₅₄ a₂'éin₂ le₂jaun₂? ¹⁵ Jua'₅₄ mei'₂ gué₃ chan₂ jan₂ dsa₂ ñe'₂, o₃ jan₂ dsa₂ mí₂ rín'₅₄ jniog₄, 'ín₂ tsin'₅₄, 'ín₂ a₂gué'₃, 'oin₅₄ ñi₂₃ le₂o₃ jmi₄; ¹⁶ néd₁jua'₂ chan'₂ 'nia'₂ i₂ca₂chei'₅₄: "Guan'₂ caun₂ dse₃ quiáng'₂", o₃ "Guan'₂ o₂jme₁dsion'₂", o₃ "Guan'₂ o₂jme₁tan₅₄ ja₁quiáng'₂", néd₁jua'₂ tsá₃ ca₂cué'₅₄ gué'₂ 'nia'₂ a₂dsen₅₄ a₂'nió'₅ quió'₅ ni₁ñi₁₂, ¿'e₂ bá₄ ta₁ jmo₃ a₂'én'₂ 'nia'₂ le₂néd₅? ¹⁷ Le₂néd₅ bá₄ léd₅ quian'₅₄ a₂'én₂ dsa₂: néd₁jua'₂ tsá₃ léi₄ qui₂rë₂jníá₁ a₂jmo₅ dsa₂ a₂'ua₁ dsí₅, tsá₃ 'e₂ ta₁ tí₄ a₂'én₂ jaun₂, léd₅ caun₂ co₂'nió'₄ a₂'lag₄ bá₄ jaun₂.

¹⁸ 'An₁ chan₂ bá₄ i₂juá'₂ néd₃: "'Én'₂ bá₄ 'ne₂, la₁ jníá₂ gué'₂ jmo₂₃ a₂dse₃." Jníá₂ juá'₅: 'É₄ a₂'éng'₂, on₃jua'₅₄ quian'₅₄ a₂dse₃ a₂jmo'₂, jaun₂ jníá₂ néd₃ jme₁jniag₅ a₂'éng₂ tē₂le₃ quian'₅₄ a₂dse₃ a₂jmo₂₃. ¹⁹ 'Én'₂ bá₄ 'ne₂ a₂chan₂ jan₂ Diú₄; ¿'e₂ a₂dse₃ jmo'₂ néd₁jua'₂ le₂jaun₂? Ján₃ bá₄ le₂néd₅ gué'₂ je₂na'₅₄ 'éin₂ a₂chan₂ Diú₄, la₁ jlein₂₃ bá₄. ²⁰ La₁ 'ne₂ néd₃ dsa₂ co₄,

^b8 Levítico 19:18.

^c11 Éxodo 20:14; Deuteronomio 5:18.

^d11 Éxodo 20:13; Deuteronomio 5:17.

¿'niog'₂ cuë₅₄ jniá₂ caun₂ léi₄ a₂tsá₃ 'e₂ quen₅ a₂'én₂ dsa₂ në₁jua'₂ tsá₃ 'e₂ a₂dse₃ a₂qui₂rë₂jniá₁ jmo₂₃? ²¹ ¿On₁jua'₅₄ ca₂të₁tsin'₅₄ rë₂ Abraham ne₄ Diú₄ të₂le₃ quian'₅₄ a₂dse₃ a₂jme₁jme₂jniai₂₃ lia'₂ con'₂ jme₁ca₂jéin'₂ Isaac ja₁ñj'₅₄ quiáin₅ ne₄ Diú₄ a₂jme₁jnag'₃ ne₄ ne₄chei₂? ²² Rë₂ de'₂ quion₂ 'nia'₂ 'í₁ 'a₂ lia'₂ ca₂lë₃ quian'₅₄ Abraham: ja₁jaun₂ ca₂rë₃jniá₂ a₂'én₂ të₂le₃ quian'₅₄ a₂ca₂rë₃jniá₂ a₂ca₂jmo₃ jaun₂, ja₁jaun₂ ca₂jáu'₃ 'í₁ ca₂'ñja₅ a₂'én₂ të₂le₃ quian'₅₄ a₂ca₂rë₃jmo₃ jaun₂. ²³ Le₂në₅ bá₄ ca₂rë₃ti₃ a₂juá'₂ ne₄ Si₂ 'iin₂₃ Abraham ja₁juá'₂: "Ca₂rë₃'én₂ Abraham ja₁con₂ Diú₄; a₂ca₂rë₃'én₂ le₂jaun₂ në₃, ca₂guéi'₂ Diú₄ të₁tsiin'₅₄ líin₅ dsa₂ dsen₃." ^e Jaun₂ Diú₄ në₃ ca₂caun₃ ca₂lin₃ 'éi₂ a₂mei₅₄ quiáin₅. ²⁴ Ja₁në₅ bá₄ rë₂jniá₂ jaun₂ në₃, 'a₂ lia'₂ të₂tsin'₅₄ dsa₂ rë₂ ne₄ Diú₄ të₂le₃ quian'₅₄ a₂dse₃ a₂jmo₂₃, on₃jua'₅₄ rë₂ a₂jnja'₅₄ 'nió'₅ juá'₂ a₂'én₂. ²⁵ Ján₃ bá₄ le₂në₅ ca₂lë₃ quian'₅₄ Rahab i₂jme₁'nag₅ quió'₅; ^f ca₂të₁tsiin'₅₄ rë₂ ne₄ Diú₄ të₂le₃ quian'₅₄ a₂dse₃ a₂ca₂jmo₃: ca₂cuë₃ dsi₂néi₂ quió'₅ ca₂jnja₃ dsa₂ quiáin₅ Diú₄, ján₃ guë'₂ ca₂jme₃'oin₅₄ dsa₂ 'éi₂ ca₂'uág'₂ jui₅ siá'₂. ²⁶ Jaun₂ le₂në₅ bá₄ jui₁lia'₂ ni₁ñjí₅ a₂tsá₃ jme₂dsí₂ 'i₄, lë₅ caun₂ ni₁ñjí₅ 'lag₄, ján₃ bá₄ le₂në₅ lë₅ a₂'én₂ dsa₂, në₂jag₄ bá₄ 'lag₄ ján₃ në₁jua'₂ tsá₃ rë₂jniá₂ a₂dse₃ a₂jmo₂₃.

Jui₁lia'₂ le₁tsi'₂ dsa₂

3 ¹ Rín'₅₄ jniog₄, tsá₃ 'nió'₅ jua'₅₄ juin₅ i₂lén₂ të₅ jin'₄ 'nia'₂, ia₁ ma₂ñjí'₅₄ bá₄ 'nia'₂, 'ñjo₅ gué₄ bén₂ 'éi'₃ të₃dsi₅₄ ja₁con₂ jniog₄ con'₂ lág₅ i₂jme₂tín₁ rín'₅₄. ² Ia₁ ca₂le₃jág₃ bá₄ jniog₄ co₂dsi₂'én₅ ne₄ 'lióng₂ ne₅₄. Në₁jua'₂ chan₂ i₂tsá₃ ma₃dso₄ 'no₅ 'i₁ca₂juíg₄ ja₁dsia₂₃ jág₁, dsa₂ le₂'éi₂ líin₅ dsa₂ rë₂'ñja₅, i₂'io₅ bí₂ ne₄ ni₁ñjí₁₂ 'ñiog₅, ta₁jain₂, ³ Jui₁lia'₂ jme₁tó'₅ dsa₂ ni₁ñjí₁ mi₂'o₄ dsi₂cua₁ ia₁jaun₂ jme₃ti₃, lë₂ jéin'₂ dsa₂ ta₁jain₂ 'a₂ jui₅ 'nio₃ dsa₂ jiog₃. ⁴ Ní₂ de'₂ 'nia'₂ ján₃ jui₁lia'₂ ni₁barco jui₁'a₂ gué'₂ lia'₂ ca'₅₄ pa₁ líin₃, qui₂'lia'₂ dsí₂tiá₂, dsa₂ i₂quian₅ në₃ lë₂ le₃cán₂ 'a₂ jui₅ 'nio₃, quian'₅₄ caun₂ timón pí'₁ bá₄. ⁵ Le₂në₅ bá₄ lë₅ quian'₅₄ le₁tsi'₂ dsa₂ ján₃; le₁tsi'₂ dsa₂ lë₅ caun₂ ni₁ñjí₅ pí'₁ ton₅ ni₁ñjí₁ dsa₂; 'e₂ bá₄ líin₂ lë₂ le₃jmo₃ 'lióng₂ jág₁ ca'₅₄. iNí₂ de'₂ 'nia'₂ ján₃, 'e₂ gué₄ pa₁ 'ña₁ má'₂ lë₂ le₃dsi'₂ quian'₅₄ ca₂míg₂ si₂ pí'₁! ⁶ Jaun₂ le₁tsi'₂ dsa₂ në₃, lë₅ co₂'nió'₄ caun₂ si₂ a₂quian'₅₄ quió'₅ dsa₂. A₂lë₅ co₂'nió'₄ caun₂ mi₂güíg₃ 'lig'₅₄ a₂ton₅ ni₁ñjí₁ jniog₄, a₂jmo₅ ta₁ a₂qui₂rë₂'ñjo₅ dsa₂ ta₁jain₂. Quian'₅₄ jág₁ dséi₂ a₂'ñiog₂ jniog₄, në₂jag₄ bá₄ a₂guí'₂ si₂ le₁tsi'₂ jniog₄ jui₅ quián₂ të₁lia'₂ chong₂, lë₅ në₂jag₄ bá₄ si₂ a₂ca₂tín₂ bí₂ quian'₅₄ tsí'₅₄ si₂ a₂já₅ guio₃-juíg₃. ⁷ Qui'₅₄ jmjig₄ dsa₂ mi₂güíg₃ jme₃'uáin₂ dsí₅ ca₂le₃jé₃ ne₅₄ já'₂ i₂tsau₂ dsí₅, já'₂ i₂'in₅, já'₂ i₂tsé'₅ quió'₅, já'₂ i₂chan₂ jmi₁ñjí'₄ në₃, ⁸ la₁ 'i₁jan₂ dsa₂ tsá₃ 'ein₂ ma₂tió'₃ jme₃'uáin₂ le₁tsi'₂ guioin₅₄. Lë₅ caun₂ a₂'lig'₅₄ a₂tsá₃ tei₄ lë₂ le₃jmo₃, qui₂rë₂can'₂ jág₁ dséi₂ në₂jag₄ bá₄ mí₅ 'lig'₅₄ a₂dsan₂ dsa₂. ⁹ Quian'₅₄

^e23 Génesis 15:6; Romanos 4:3-22.

^f25 'Nio'₂ ja₁ton₅ Josué 2:1-21; 6:17.

le₁tsí'₂ jniog₄ jme₂juín'₁ Te₁gui'₅₄ quián₂ i₂lín₅ Jmei₂ jniog₄, ton'₂ jáñ₃ guë'₂ 'íñ₅ 'lig'₅₄ dsa₂ mi₂güíg₃ i₂ma₂ca₂jmó'₂ Diú₄ lia'₂ lé₅ nió'₄ quió'₅ 'jniog₅. ¹⁰ Quian'₅₄ mi₂'o₄ jniog₄ la₂, 'uë₂ jág₁ a₂jme₂juín'₁ Diú₄, jáñ₃ guë'₂ 'uë₂ jág₁ 'lig'₅₄ a₂'íñ₅ dsa₂ rín'₅₄. Rín'₅₄ jniog₄, tsá₃ dsi₂ten₅₄ le₂në₅. ¹¹ ¿'A₂ bá₄ lia'₂ chi₂jua'₂ caun₂ o₄tu₁ jmig₂ lé₂ le₃'iá₃ jmig₂ ráu₂ lia'₂ jmig₂ dsi'₃ në₃? ¹² 'Nia'₂ rín'₅₄ jniog₄, ¿lé₂ le₃lé₂ jua'₅₄ caun₂ ni₁'ma₂ a₂'ag₅ míg₂ higo, jua'₅₄ a₂jaun₂ 'ag₃ táng₃ míg₂ aceitunas? O₃, ¿lé₂ le₃lé₂ jua'₅₄ ca₂cho'₅₄ uïng₂ uvas, a₂jaun₂ 'ag₃ táng₃ míg₂ higos? Ján₃ bá₄ le₂në₅, 'i₁caun₂ tu₄ jmig₂ ja₁'ia₂ jmig₂ njí'₅₄ tsá₃ lé₂ le₃'iá₃ jmig₂ ráu₂ në₃.

Le₂la₂ dsón'₂ bá₄ lé₅ a₂dse₃ lia'₂ con'₂ dsi₂ten₅₄ le₃ñí'₂ dsí₅ dsa₂

¹³ Në₁lua'₂ chan₂ jë₄ quián'₂ 'nia'₂ jan₂ i₂ñí'₂ dsí₅, jui₁jme₂jniai₂₃ jui₅ dse₃ 'a₂ lia'₂ ñí₂₃ të₂le₃ quian'₅₄ a₂jmo₃ a₂dse₃, a₂jmo₃ mei'₂ lia'₂ con'₂ lé₅ ñíí'₂. ¹⁴ La₁ në₁lua'₂ tion'₅₄ 'nia'₂ jmo'₂ uiñ₅ 'au'₂ cha₂ a₂dsi'₃ të₂'au'₂ 'nia'₂, tiong'₅₄ cha₂ a₂ma₂'íñ₅ 'au'₂ guiong'₅₄; në₁lua'₂ le₂në₅, tsá₃ ca₂tín'₂ 'nia'₂ jmó'₂ táng'₅, on₃ guë'₂ jmó'₂ të₂jíng'₁ quian'₅₄ jág₁ tí₅. ¹⁵ Ia₁ a₂ñí'₂ dsí₅ dsa₂ le₂në₅, on₃lua'₅₄ a₂já₅ guei'₅₄ në₅; quió'₅ mi₂güíg₃ bá₄. A₂lé₂ dsí₅ ni₁ñí₁ dsa₂ guioin₅₄, ta₁ quió'₅ je₂na'₅₄ bá₄ në₅. ¹⁶ Ia₁ jui₁lia'₂ ja₁tion'₅₄ dsa₂ uiñ₅ dsí₅ quian'₅₄ riin'₅₄, ton'₂ co₂tan₅₄ cha₂ a₂ma₂'íñ₅ dsí₅ dsa₂ a₂lí'₂ jmá'₃ guioin₅₄, ja₁le₂jaun₂ tsá₃ 'e₂ dse₃ chí'₅ tion'₅₄ dsa₂, ton'₂ jmo₅-dsáu₅ dsa₂ ca₂le₃jé₃ ne₅₄ a₂'lig'₅₄. ¹⁷ La₁ jui₁lia'₂ ja₁ñí'₂ dsón'₂ dse₃ dsí₅ dsa₂ a₂já₅ guei'₅₄ i₂juíg₃, jé₂le₂'uíg₅₄ de'₂ chan₂ dsa₂ quian₅ caun₂ jui₅ le₁jé₃; ñó₅ jaun₂ táng₃ 'no'₂ jui₅ ja₁'ag₃ tei₄; 'en₅₄ dsí₅ dsa₂ líñ₅ në₃; caun₂ dsáu₅ dsí₅ bá₄ 'e₂ caun₂ a₂lé₂; chain₂ ñéi₂ dsí₅ dsa₂ mi₂güíg₃ riin'₅₄; jmo₂₃ jmá'₃ lia'₂ a₂dse₃; ton'₂ tsá₃ 'e₂ qui₂co₂₃ jág₁ quió'₅; ton'₂ tsá₃ jua'₅₄ a₂lé₁co₂jmo₂₃ o₁ne₁ në₃. ¹⁸ Dsa₂ i₂quín'₅ bí₂ jne₂₃ a₂'ag₃ tei₄, jaun₂ ro'₂ a₂le₃chain₂ caun₂ jui₅ co₂dsau₅.

Jui₁lia'₂ jme₁tón'₅ dsa₂ 'én₂ jmo₂₃ jáñ₃ a₂jmo₅ dsa₂ mi₂güíg₃

4 ¹ ¿'A₂ jui₅ já₅ mi'₅₄ 'nei₂ a₂cha₂ jín'₄ 'nia'₂? ¿On₁lua'₅₄ 'uíg₅₄ ia₁ a₂'niog'₂ 'nia'₂ le₃chang'₂ o₂'ñíó₃ o₂ñjia₃ 'au'₂, cuë₅ 'nei₂ ni₁ñí'₁ 'nia'₂? ² Cha₂ a₂'niog'₂ 'nia'₂ jui₁lia'₂ a₂tsá₃ cha₂ quiáng'₂. Uíñ₅ 'au'₂ 'nia'₂ líng'₅. Ia₁ tsá₃ le₃lén'₂ 'nia'₂ a₂'íñ₅ 'au'₂. Jmo'₂ 'nia'₂ mi'₅₄, dsia'₂ 'nia'₂ 'nei₂ në₃, la₁ tsá₃ cha₂ quián'₂ 'nia'₂ në₃, ia₁ tsá₃ mi'₂. ³ Jui₁lia'₂ jme₁mi'₂ guë'₂ 'nia'₂, la₁ tsá₃ ñí'₂ guë'₂ 'nia'₂ 'uíg₅₄ ia₁ tsá₃ mi'₂ 'nia'₂ con'₂ dsi₂ten₅₄, ia₁ a₂ñjia₃ 'niog'₂ 'nia'₂ 'éng'₄ a₂le₃chang'₂ o₂'ñíó₃ o₂ñjia₃ 'au'₂ bá₄. ⁴ i'E₂ gué₄ líñ₅ 'nia'₂ jui₁lia'₂ líñ₅ dsa₂ mí₂ i₂tsá₃ jen₅₄ dsí₂i₂gu₂, qui₂'no'₂ jui₅ dsó₅ quian'₅₄ i₂sián'₂! ¿Tsa₁ ñí'₅₄ 'nia'₂, jui₁lia'₂ dsa₂ i₂jen'₂ dsí₅ quian'₅₄ mi₂güíg₃, i₂le₂'éi₂ të₂tsín'₅₄ líñ₅ i₂'ñjia₅₄ Diú₄ bá₄? Jaun₂ lë₃, jui₁'ein₂ gué₃ i₂jen'₂ quian'₅₄ mi₂güíg₃, i₂'ñjia₅₄ Diú₄ bá₄ 'éi₂. ⁵ ¿O₃ bá₄ líñ₂ 'nia'₂, on₃lua'₅₄ 'e₂ cha₂ jein₅ jág₁ a₂juá'₂ ne₄ Si₂: "Jme₂dsí₂

i₂ma₂cui₃ i₂'en₅₄ jë₄ quián₂ jniog₄, dsí'₅ 'ñio₅ lín₃ ia₁ a₂'nio₃ jniog₄"?^g

⁶ La₁ të₂le₃ 'ñio₅ gué₄ bén₂ a₂'ua₁ dsí₅ Diú₄ a₂cuë₂₃ jniog₄; 'uig₅₄ jaun₂ juá'₂ ne₄ Si₂:

Nau₂ Diú₄ quein₅ ne₄ dsa₂ i₂jmo₅ tán'₅,

la₁ jmo₂₃ 'ua₁ dsí₅ ja₁con₂ dsa₂ i₂jmo₅ me'₂.^h

⁷ Tión'₂ 'nia'₂ o₄gú₃ Diú₄. Tsá₃ lë₁cuín₅ 'nia'₂ i₂së₃dsen₃, jaun₂ i₂cuïng₃ bá₄ 'éi₂ ja₁con'₂ 'nia'₂. ⁸ Jme₁quián₄ 'nia'₂ të₂le₃ ja₁con₂ Diú₄, jaun₂ bá₄ jme₃quián₃ 'éi₂ ja₁con'₂ 'nia'₂ ján₃. 'Nia'₂ dsa₂ i₂qui₂rë₂cán'₄ dso₄, rang₂ 'nia'₂ gog'₂; jmo₄ 'nia'₂ le₁jé₃ të₂'au'₂, 'nia'₂ dsa₂ i₂le₁'ág₄ caun₂-tín₃ dsí₅.

⁹ Tión'₂ 'nia'₂ quian₂ o₂i₁ dsí₅, qui'₂-'o₄. Nág'₄ quián₂ 'nia'₂, jui₁le₂tsín₃ jui₁le₅₄ a₂qui'₂-'áu'₂ 'nia'₂; ján₃ guë'₂ le₂në₅ në₁jua'₂ chan'₂ 'nia'₂ i₂'io'₂ jén'₅, jme₁tsín₄, tión'₂ 'nia'₂ 'lia'₂ 'au'₂. ¹⁰ Jmo₄ 'nia'₂ meg'₂ të₂le₃ ne₄ Te₁gui'₅₄, jaun₂ bá₄ chó'₂ 'éi₂ táng₃.

Diú₄ bá₄ i₂ca₂tín₂ con₂ 'í₁

¹¹ Rin'₅₄ jniog₄, tsá₃ 'ín₅ 'nia'₂ 'lig'₅₄ ríng'₂ le₂jang'₂ le₂jang'₂. Ia₁ jui₁lia'₂ i₂'in₅ 'lig'₅₄ jan₂ rìn'₅₄, o₃ ñi₂₃ qui₂con₂ 'í₁, co₂'nió'₄ 'lig'₅₄ bá₄ 'ë₅ 'éi₂ 'Éi'₃ quió'₅ Diú₄, ton'₂ jmo₂₃ dsí₅ tsá₃ 'e₂ quen₅ 'Éi'₃. Ia₁ në₁jua'₂ cáun'₂ 'ne₂ 'í₁ ne₄ 'Éi'₃, co₂'nió'₄ bá₄ a₂ma₂jmo'₂ 'au'₂ ján₃ a₂líng'₅ jan₂ i₂'io₅ bí₂ con₂ 'í₁ ne₄ 'Éi'₃ 'nió'₄ a₂jme₁ti'₄ 'ñiag'₂. ¹² Jan₂ tan₅₄ bá₄ i₂chan₂ i₂ca₂tín₂ cuë₃ 'éi'₃; i₂'éi₂ bá₄ lín₅ i₂'io₅ bí₂ dsí₃ 'éi'₃, jaun₂ 'ñiog₅ bá₄ 'éi₂ në₃ lé₂ le₃lió₂ o₃ 'liog'₃ 'e₂. La₁ ?i₂'ein₂ bá₄ 'ne₂? ?'E₂ lë₃ cáun'₂ 'í₁ quió'₅ dsa₂ mi₂güíg₃ ríng'??

¹³ Në₃ në₃, nei₂ 'nia'₂ a₂la₂, 'nia'₂ i₂jag₄ juá'₂: "Në₃ o₃ 'ióg₃, dsau₅₄ ciudad në₅, o₃ ciudad ó₃; ja₁jaun₂ dsí₁ñag₅₄ caun₂ ñi₂ dsí₁nág₁ dsí₁jmó₁ 'ma'₅₄ jaun₂ léi₂ cu₄." ¹⁴ La₁ 'i₁ca₂juig₄ tsá₃ jaun₂ ñi₁'54 'nia'₂ 'e₂ lé₂ 'ióg₃, dsí₂jui₅ ja₁o₁nóg'₅. Ia₁ jui₁lia'₂ lë₅ caun₂ bë'₅₄ jnei₅ tei₂ bá₄ lín₅ 'nia'₂, në₃ jniá₂ 'ei₅, në₃ cón'₅ tsá₃ ma₃cha₂ táng₃. ¹⁵ 'Nió'₄ a₂jme₁dsiá'₂ 'nia'₂ jág₁ le₂në₅, le₂la₂ bá₄ ca₂tín'₂ 'nia'₂ dsiá'₁: "Chi₂jua'₂ le₂jaun₂ 'nio₃ Te₁gui'₅₄ le₃chong₂ jniog₄, jaun₂ bá₄ dsí₁jmó₁ a₂la₂ a₂ó₃." ¹⁶ La₁ 'nia'₂ në₃, ting'₂ dsia'₂ jág₁ tá'₅ jmo'₂ 'nia'₂ róng'₂; ca₂le₃jé₃ a₂dsia₅ dsa₂ jág₁ le₂në₅, 'lig'₅₄ bá₄. ¹⁷ Jaun₂ në₃, dsa₂ i₂ñi₅ a₂dse₃ a₂lé₂ le₃jmo₃, la₁ në₁jua'₂ tsá₃ ca₂jmo₃ në₃, dso₄ bá₄ jaun₂ le₃quió'₅ 'éi₂.

A₂rë₂ 'é₂ jág₁ ja₁con₂ dsa₂ cha₂ cu₄

5 ¹ iNei₂ 'nia'₂ a₂la₂, 'nia'₂ dsa₂ i₂cha₂ cu₄! Qui'₂-'o₄, guio'₅₄ 'nia'₂ o₄quió'₄ ca₂le₃jé₃ ne₅₄ jmi₁uig₅ a₂dsi₃ñí'₂ 'nia'₂. ² Ca₂le₃jé₃ a₂cha₂ quián'₂ 'nia'₂ ma₂'áu₁, le₂jaun₂ guë'₂ 'mí'₂ a₂qui'₂ 'nia'₂ ma₂qui'₅ i₁cá₁. ³ Cu₄nióg₄ cu₄tiog₂ quián'₂ 'nia'₂ qui₂ma₂'io₂ juí'₅. Já₅ caun₂ jmi₄ jáng'₃ léi₄ juí'₅. A₂në₅ bá₄ a₂co₃dsag₅₄ quián'₂ 'nia'₂, a₂dsiá₃ ni₁ñí'₁ 'nia'₂

^g5 'Nio'₂ ja₁ton₅ Éxodo 20:5.

^h6 Proverbios 3:34.

guiong¹⁵⁴, lé₂ né₂jag₄ bá₄ si₂. Ia₁ 'ñio₅ lín₃ qui₂ma₂dsia¹⁵⁴ 'nia'₂ le₁má'₂ ca₂le₃jé₃ ne₅₄ a₂cha₂ quiáng¹, jmíg₄ jë₁ca₂tó'₂ la₂. ⁴iJag₄! 'Lian'¹⁵⁴ dsa₂ i₂qui₂ma₂jmo₃ ta₁ ja₁nau₂ quián¹ 'nia'₂ 'lian'¹⁵⁴ dsa₂ a₂tsá₃ ca₂qui¹⁵⁴ 'nia'₂, guió¹₅ 'o₂₃; le₂jaun₂ guë'₂ jág₁ quió¹ guion¹⁵⁴ dsa₂ 'éi₂, ma₂dsi₃lé₂ gua₄ Te₁gui¹⁵⁴ Juíg₅₄ 'Lióg₂. ⁵Ia₁ 'ñio₅ lín₃ dse₃ jlá'₁ ma₂ca₂rë₃chán₃ 'nia'₂ ne₄ gua¹⁵⁴ 'uë₃ la₂, ma₂qui₂ma₂quian¹ 'nia'₂ o₂'ñio₃ o₂jnia₃ dsí₅. Ma₂ca₂jme₁'on¹ 'nia'₂ lia¹ 'on'¹⁵⁴ ca₁jui₅; la₁ já₅ jmíg₄ ja₁dsián¹ 'nia'₂ jui₁lia¹ dsan₂ ca₁jui₅. ⁶'Nia'₂ ma₂qui₂ma₂'liáng¹ '3 ma₂ca₂jme₁dsiang¹ dsa₂ i₂tsá₃ 'e₂ rín₂; ètsa₁ lín¹ 'nia'₂ jnia¹⁵⁴ dsa₂ 'éi₂ mi₃ të₃dsí₅₄ 'éi'₃ jmíg₄ jaun₂?ⁱ

A₂chan₂ dsa₂ juin¹ dsí₅ lín₅ caun₂ chi₁jnia₂₃ a₂jeín¹ Diú₄ 'e₂ ma₂mi₃

⁷ Jaun₂ né₃, rín¹⁵⁴ jniog₄, jmo₄ 'nia'₂ juin¹ 'au'₂ ca₂lia¹ ca₂té₂ jmíg₄ i₁guan¹ Te₁gui¹⁵⁴. Jui₁lia¹ jan₂ dsa₂ i₂jmo₅ ta₁ ja₁nau₂ chi₁jnia₂₃ ráu₃ dse₃ lin₃ ta₁ quió¹, jaun₂ caun₂ jmo₂₃ juin¹ dsí₅ bá₄ chi₁jnia₂₃ a₂guá₂ le₂'uig₅₄ jmí₅ tiá₄, a₂të₅₄ jein₂ jmí₅ né₃. ⁸Le₂në₅ bá₄ 'nia'₂ jáñ₃, jmo₄ 'nia'₂ juin¹ 'au'₂, caun₂ 'éi₂ 'nia'₂ 'au'₂, ia₁ ja₂quián₃ bá₄ jmíg₄ a₂guan¹ Te₁gui¹⁵⁴. ⁹Rin¹⁵⁴ jniog₄, tsá₃ ma₃o₁le₅₄ 'au'₂ 'nia'₂ jua¹⁵⁴ a₂caun₂ qui₁'ní¹ gué₄ 'nia'₂ ríng¹ le₂jang¹ le₂jang¹, ia₁jaun₂ bá₄ tsá₃ të₃dsí₅₄ 'éi'₃ ja₁con¹ 'nia'₂ guiong¹⁵⁴. Ia₁ jué₄ i₂qui₃dsí₅ 'éi'₃ né₂jag₄ i₂ma₂chén¹ o₄'né₄ bá₄ 'éi₂. ¹⁰'Nia'₂ rín¹⁵⁴ jniog₄, quian₂ 'nia'₂ jui₅ jui₁lia¹ jui₅ a₂ca₂can₃ dsa₂ i₂ca₂'é₂ jág₁ quián₅ Te₁gui¹⁵⁴ ma₂líg¹. Ca₂rë₃juín¹ dsí₅ ne₄ ca₂le₃jé₃ jmi₁uig₅ a₂ca₂i₃jñí₂. ¹¹Jag₄ jaun₂, jmo₂ jniog₄ dsí₅, 'e₂ gué₄ dsen₃ dsa₂ i₂ca₂nau₂ tiá₂ 'éi₂. Ján₃ bá₄ ñi¹⁵⁴ 'nia'₂ 'a₂ lia¹ ca₂rë₃juín¹ dsí₅ Job, ca₂nau₂ tiá₂, ton¹ ñi¹⁵⁴ bá₄ 'nia'₂ jáñ₃ 'a₂ lia¹ ca₂jme₃gu¹⁵⁴ táng₃ Te₁gui¹⁵⁴ quió¹ 'éi₂ jë₁ca₂tó¹. Ia₁ le₂në₅ bá₄ jau¹ 'í₁ i₂'ua₁ dsí₅ lín₃ bá₄ Te₁gui¹⁵⁴, ton¹ ñéi₂ dsí₅.

¹²Le₂në₅ bá₄, jmo₄ 'nia'₂ ne₄ ca₂le₃jé₃, rín¹⁵⁴ jniog₄, jui₁lia¹ jme₁dsia¹ 'nia'₂ jág₁, tsá₃ lë₁'ë₂ 'nia'₂ guei¹⁵⁴ i₂juíg₃, on₃ guë₂ 'ë₂ 'nia'₂ gua¹⁵⁴ 'uë₃, on₃ guë₂ 'i₁caun₂ cosa siá₂ a₂lë₁'é₁ 'nia'₂ jua¹⁵⁴ a₂'íng¹ Diú₄. Jë₁ma₂të₂ rë₁dsiá¹ 'nia'₂ jág₁, jua¹⁵⁴ 'nia'₂ "ján₅", jui₁le₂ti₃ bá₄ "ján₅" jaun₂; jáñ₃ bá₄ le₂në₅ jui₁lia¹ jme₁jua¹ 'nia'₂ "jan₂'ón₄", jui₁le₂ti₃ bá₄ "jan₂'ón₄" jaun₂, ia₁jaun₂ tsá₃ të₃dsí₅₄ 'éi'₃ ja₁con¹ 'nia'₂.

¹³Në₁jua¹ 'ein₂ 'nia'₂ chan₂ o₂i₁ dsí₅, jui₁chi₂lén¹ ne₄ Diú₄. Në₁jua¹ 'ein₂ guë¹ chan₂ i₂'ei₅ dse₃ dsí₅, jui₁'ë₁₂ son₅₄ a₂rë₂juin¹ Diú₄. ¹⁴Në₁jua¹ chan₂ 'ein₂ i₂dso¹⁵⁴, ca₂tíñ₂ té¹ dsa₂ can¹⁵⁴ quián₅ guá¹₅, ia₁jaun₂ chi₃lén¹ 'éi₂ Diú₄ ne₄ quió¹, jaun₂ tsáng₂ no¹⁵⁴ lia¹ con¹ lë₅ 'éi'₃ quió¹ Te₁gui¹⁵⁴. ¹⁵Ia₁ jë₁chi₂lén¹ dsa₂ Diú₄ a₂'ein₂ të₃dsón₂, 'lión₂ dsa₂ dso¹⁵⁴; chó¹ bá₄ Te₁gui¹⁵⁴. Në₁jua¹ 'e₂ dso₄ ma₂táiñ₂ né₃, 'én₂ bá₄ dsáu₁.

¹⁶Jaun₂ lë₃, jme₁jnia₅ 'nia'₂ ne₄ ríng¹ 'e₂ ma₂qui₂ma₂'lian¹ 'nia'₂, jáñ₃

ⁱ6 o₃, "tsá₃ jua¹⁵⁴ a₂jaun₂ tsá₃ ca₂guen₃ 'éi₂."

^j14 griego: presbúteros.

guë'₂ chi₂len'₄ 'nia'₂ Diú₄ o₄quió'₄ ríng'₂ le₂jang'₂ le₂jang'₂ ia₁jaun₂ 'lión'₂ 'nia'₂. Ia₁ jui₁lia'₂ dsa₂ i₂tión₂ rë₂ ne₄ Diú₄, 'io₅ bí₂ jág₁ quió'₅ 'e₂ caun₂ a₂mi₂₃ ne₄ Diú₄. ¹⁷ Elías jme₁lín₄ jan₂ dsa₂ lia'₂ lág₅ jniog₄; jme₁ca₂mi₃ jé₄ chi₂léin'₂ Diú₄ a₂co₂ŋei'₅₄ tsá₃ ma₃téin₃ jmí₅, jaun₂ 'ni₅ ŋi₂ të₂ ca₂dsio₄ tsá₃ ma₃jmí₅ ca₂tang₂ ne₄ gua'₅₄ 'uë₃. ¹⁸ Cang₂ jaun₂, ca₂mi₃ táng₃ ne₄ Diú₄, jaun₂ ca₂tang₂ táng₃ jmí₅, ca₂rav₂ táng₃ ne₄ gua'₅₄ 'uë₃.

¹⁹ 'Nia'₂ rin'₅₄ jniog₄, në₁jua'₂ chan₂ 'nia'₂ i₂dsí₂cón'₅ dsí₅ jui₅ dsau₅, në₁jua'₂ jan₂ guë'₂ i₂ca₂jéin'₂ táng₃, ²⁰ dsá₂ 'au'₂ 'nia'₂ jmo₄ a₂la₂: jui₁'ein₂ gué₃ i₂jén'₂ jan₂ dsa₂ i₂rë₂cán'₄ dso₄ jui₅ 'lig'₅₄ a₂jme₁ma₂ŋó₅, lióin₂ jme₂dsí₂ quió'₅ 'éi₂ ne₄ 'mú₃, jaun₂ le₂në₅ jlé₂ 'lióng₂ dso₄ dsí₂'én₂ né₃.

Co₂në₅.